

Spoeëkegezèt

jannewarie 2025



Jeugdprins Keano
& Jeugdprinses Zoë



Prins Danny I

V.V. De Spoeëkejaegers

5x11
jaor





Inhoud

Veurwoord Veurzitter Lars Beerens	3
Programma	4
Veurwoord Vorst Marc Heijmans	5
De jeugd heet de toekomst	6
Jubilarisse & bestuur	7
Spoeëke rondj de hoêze & Spuuëkskes van watte	8
Jubileumprins Danny I	10
Jeugdprins Keano & Jeugdprinses Zoë	14
Bonkie en Bokworst	16
Boôrebroeloft	18
Buurvraw & Buurvraw	20
Poster hooghede	22
De Burgervader en First Lady van Wieërt	25
Jeugd Boôntje Middig	28
Puzzel: Spoeëk jaage	29
Vastelaovundj Horoscoop	30
Mistig Wit & Móssele Mistig Wit	32
Puzzele	34
De legendje vanne Spoeëkejaegers	36
Interview mét 't spoeëk	38
Teikene en kleure	39
Buurte over buutte	40
Woord van de redactie	43

Veurwoord Veurzitter Lars Beerens



Spoeëkejaegers en Spoeëkejaegerinnekes,

Wederom is der un jaor veurbeej gevlooge, waat waas ut un gaaf jaor, un jaor woeë we hebbe genoote van Prins Gerrit 1 mè zien prinses Eefke, en nateurlik ozze kleine groeëte man jeugdprins Gijs. Un jaor woeë we op trök kinne kieke woeë we schoeëne herrineringe hebbe gemaaktj, mer auch weer een jaor woeë we aafschieëd hebben motte neeme van een aantal echte Spoeëkejaegers die met zekerheid gemisj gaon waere.

Veur degene die mich neet kinne, ich bin Lars Beerens, zoeën van Johan en Truus Beerens. Os mam is der ein van Meuwissen en os Pap heet wat door ut limburgse getrokken, geboore oppe Diëek in Ospel, mer vluughaor onger zien naas gekregen in Hunsel. Die der vervolgus in Swartbrook weer is verlore.

Nao t seizoen is der nao alle leeje unne mail gesteurdj wooë noa ich mig heb aangemeldj om kandidaat veurzitter te waere. Laot mig veuropstelle det det neet un beslissing is die euver eine nacht ieës geit. Al sinds un aantal jaor hebben we de gesprekke in het bestuur detter unne noowe veurzitte mot koome, omdat Ger zien functie in deze nieër woos ligge.

Ich heb altieëd gezagd, Ger as ich oets weer in Swartbrook woeën, dan wil ich der waal uns over nao gaon deenke. Veur degene die 't neet weite ich woeën al 10 jaor saame mè Dennis oppe Schuttebeemd op Groenewoud, dao in Wieert tegenover de apothieëk.

Toen Ger definitief aangoof te willen stoppe met dees functie heb ich der uns good euver nao gedachtj, en tot de conclusie gekoome waat veur un ontzettendj gaaf vereniging we hebben en waat grueëts we dao met z'n alle op mooge zeen. De Jeugd, De Vröllie, os Road en nateurlik de Boorekepel woeë ich zelf de Trompet

blaos. Un vereniging woeë we alles saame probere te regele, woeë waal us wat onenigheid is, mer woeë we dan saame un oplossing veur zeuke en dan onger ut genot van unne pot beer der achteraf om kinne lache. Un Vereniging woeë laeftieëd geine rol speultj, jongk en oad klasjeneertj mè deindanger. Det is toch sjoëen! Un bestuur det nao mien gevoel kloptj met bestuurslede dwars door de vereniging haer, unne penningmeister dae kin telle en un secretariaat det kleentj wie un klok. Dan wil ich neet zegge det t as veurzitter gemaekelik waerdj, mer zoelang ich der energie van krieg en gae ut der nateurlik mit ins zeetj wil ich dees functie met Trots vervulle.

Mergood door nao de orde van de daag, we hebben een fieësje te veere dit jaor. Wae bestaon 5x11 jaor..... Waat is in die 55 jaor toch völ gebeurtj, we zeen vanaaf dit seizoen mè mieër as 100 lede... gaotj us effe nao wiewul detter det waal neet zeen, veur zoe 'n klein dörpke wie os Swartbrook. De vastelaovundj laeftj en laote we der saame, mè zien alle veur zörge det de vastelaovundj blijftj leave in Swartbrook.

Proficiat allemaol, bedanktj veur eur vertrouwe en we gaon der saame een kei gaaf seizoen van maake!

Vastelaovundj groet,

Veurzitter Lars





Programma

11 jan	Prinsebal
14 fib	Boôntje Aovundj
15 fib	Jeugd Boôntje Middig & 2e Boôntje Aovundj
20 fib	Prinsetrefe
21 fib	Jeugdprinsetrefe
23 fib	Prinseresepsie
26 fib	Senioremiddig
28 fib	Jeugd Vastelaovundj Aovundj
1 mrt	Boôrebroeloft
4 mrt	Optocht & Abdicatie

Al dees activiteite vinje plaats in "ut Spoeëkepliês" MFA De Corneel.



Veurwoord Vorst Marc Heijmans

Spoeëkejaegers 5 x 11 jaor

Waat vluûgtj de tieëd! Ut veultj nog wie de daag van gister det wae de gezet van 4 x 11 jaor aan ut schrieëve woore. Noeë zeen wae weer 11 jaor aojer gewoore en laeftj de Vastelaovundj nog altieëd as noeëts teveure. De Raod en de Kepel zeen weer verder gegruûdj, wae hebbe un prachtig monument op ut kerkplein der beej gekrege, der zeen nog zat minse om aan de Boôntje Aovundj met te doon, der waere noewe activiteiten gestartj, noewe bestuursleden zeen der beej gekome en noeëwe werkgroepen zeen gemaaktj, alles is veur ut jubileum prachtig gepimpt in Spoeëkejaegers blauw en wae hebbe weer un noowe Prins en Jeugdprinsenpaar oetgeroope.

Toen mog ich nog as veurzitter achter de sjerme de vereniging aansteure en noeë moog ich as vorst alweer versjillendje jaore veurop gaon. Zoeë gruûets as ich toen waas, zoeë gruûts bin ich noeë nog steeds! Waat un prachtige vereniging en waat staon wae der netjes op as wae urges haer gaon. As de Spoeëkejaegers urges binnenkome dan keumtj der ouch echt get binne! De kepel bleustj os nao bove en ut podium is meital te klein om alle minse bove te laote

staon. De jeugd geit nog steeds gaer mét en dét is misjien waal ut belangrieëkste; Weem de jeugd heet, heet de toekomst en daarom bin ich der hieël gerustj op det wae euver 11 jaor nog steeds mèt un groeëte springlaevendje vereniging de vastelaovundj veere. Ouch dankzij alle vriewilligers die os eeder jaor weer oethelpe met allerlei taken. Danke, danke!

Op ut Prinsenbal is de Prinsegalerie weer in ieëre hersteldj en ut trof mich dét der de afgelaope 11 jaor toch waal hieël vól aod prinse zeen gestorve. Mer ich weit ouch hieël zeker det al die aod prinse die der neet meer zeen os blieve volge en mèt un groeëte lach zeen det de vastelaovundj in Swartbrook nog steeds laeftj. En det is woeë wae ut veur doon. Mien veurganger Bert zagt ut al: "Vastelaovundj veere dooje saame" en det is woeë ich mich aan vasthaoj. Ich wins uch allemaol unne hieële sjoëne vastelaovundj, samen met os, en huf ut glaas op de toekomst!

Alaaf!

Vorst Marc



De jeugd heet de toekomst

De Spoeëkejaegers mooge gruuëts zien op de verjonging die ze als vereniging mètmaake en op de jong garde die zich inzètj in de kapèl, de raad en in commissies tiêdes 't vastelaovundj-sezoen. D'r zien ein hieël aantal veurbieëldje te neume van minse die zich vanaaf jonge laeftiêd al inzette veur de vereniging. Ein van die veurbieëldje is 't Kliekske. Heej onger vertèlle ze wie ze zich inzette veur de vastelaovundj.



jeugdboôrebroeloft. Vanoet de bestaondje commissie kreege wae vól kanse om ideeën oppe taofel te lègge én zelf tot oetveuring te bringe. Wae plandje vergaderinge, bedachte ein thema, veurdje ein lôtting oet weem welke rol zoj krieger, noome contact op mèt aojers, deeje de oetroôping aan hoês, plandje de aovundj zelluf, maaddje filmkes, ginge posters ontwerpe en social media veurzeen van informatie, bedachte spelle en presenteerdje deze, neum ut mèr op. De commissie haaj ein concreet dreijbook ligge en ongersteundje os, mer goove os ouch echt de kans om zelluf get op touw te krieëge.

Unne haup oppe hals gehaldj

'Os' ieërste jeugdboôrebroeloft ging good, en goof os gooje mood om ut jaor d'r op weer verder te gaon. D'r woore jaore beej det wae zoeë enthousiast d'r aan begoste, det wae tiêdes de oetveuring toch regelmatig dachtje: dju, noow hebbe wae os toch waal echt unne haup oppe hals gehaldj. Wae ervarde toen pas echt wiewól werk d'r in det organisere geit zitte.

Saame van start

Os aoj basisschoolklas, veur sommige ouch waal bekindj as 't Kliekske, heet zich ongerein altiêd good verstange. Tot op de daag van vandaag spraeke wae mekaar en spraeke wae mèt deindanger aaf. En dan te bedeenke det wae in 2010 al vanne lieëgere sjool aafginge. Vanaaf 't moment det wae in groep 8 als jeugdraad oppe jeugdprinswaage mochte staon, ging ut vastelaovundj veere saame van start. De jaore daonao hebbe wae namelijk mieërdere maale mètgelaupe inne optocht as groep.

Ideeën oppe taofel lègge

In 2013 waerdje vanoet de jeugdboôrebroeloft commissie de vraag in ozze groep gestèldj weem zin haaj om mèt te helpe aan deze aovundj veur de jeugd. Mèt ein man of 8 zagte wae drèk 'jao'. Sezoen 2013-2014 waerdje 'os' ieërste

Vastelaovundj saame, det is saame veere en saame zörge det d'r geveerdj kan waere.



Jubileum

Nog altiêd zitte wae mèt 4 man vanoet 't Kliekske in dees commissie. En weem mitgeraekendj heet, heet gezeen det wae al ein vastelaovundj-jubileum hebbe: 1x11 jaor. De aovundj zelf heet versjillendje invullinge gehad door de jaore haer, mer ut doel is utzelfdje gebleeve: vastelaovundj veere mèt de jeugd!

En zoeë als de titel al zag, heet de jeugd de toekomst. Want noow ozze groep al aan de hoeëge kantj van de 25 jaor keumtj te zitte, zeuke ouch wae weer jeugd die os commissie kan veurzeen van nôw ideeën en eige inbrèng.



Saame organisere, saame veere

Dus alse dit laes en deenks: saame organisere, saame veere, det trèktj mich waal? Laot get van dich huuëre! Steur unne mail nao info@spoeëkejaegers.nl of spraek ein van os lede aan. Dit geldj nateurlik neet allein veur de commissie vanne jeugdaovundj, mer ouch veur versjillendje anger commissies binne de vereniging.

Want als de jeugd de toekomst heet, heet vastelaovundj toekomst.



Jubilarisse

De jubilarisse in 2025 zeen:

1 x 11 jaor Eric van de Schoor

1 x 11 jaor Wiel Douven

3 x 11 jaor Marjo Meuwissen

3 x 11 jaor Leo Nouwen

Ut bestuur

Veurzitter: Lars Beerens

Sikretaris: Laura Coolen

Penningmeister: Danny Jetten

Bestuursleeje: Marc Heijmans
Ger Smolenaers
Bas van Aarle
Pieter van Gijn



Spoeëke roondj de hoëze

Eeder jaor roondj ut prinsenbal koome de spoeëke weer teveursjien veur de raame in ut sjoëne Swartbrook. Sinds ut 2 x 11 jaorig jubileum is dit un traditie in ôs Spoeëkelandj.

Blieve hänge

De dames van de raad hebbe toen alle hoëze van Swartbrook van un spoeëk veurzeen met de vraog dit veur ut raam te hange. De gedachte d'r achter waas, det dit spoeëk zien laeve lang op de zelfdje plaats rondj blieve spoeëke en neet met de bewoëners met verhoeëstj. Tegenwoordig zuuse in völ steden en dörpe versierdje raame, mer in Swartbrook is dit dus al un jaore lange traditie.



Prieze veur de sjoëenste rame

Nao de vastelaovundj waere d'r door un speciaal commissie prieze oetgedaeltj veur de sjoënst versierdje raam. Dus maak d'r wat gezelligs van en weem witj, hetj gae waal unne dikke prieës verdeentj!

Wae huure gaer as det wae uch urgus mit kunne helpe, zoedet dees sjoëen traditie blieftj bestaon!

Spoeëke verkriegbaar

Is det van uch toch ut hoeës oet gespoeëktj, of heet ut eur hoeës nog neet gevonge? Laotj ut os dan efkes weete, wae zulle persoanlik un noow gaon vange in de krang en ut kosteloos beej uch toeës bringe. Sinds un aantal jaor wimpelen d'r aug Spoeëkejaegers vlaggen in ut dörp, dees waere hantj gemaaktj door os hoës neijster Ingrid Heijmans. Aug dees zeen via os te verkriege, veur de prieës van 30 euro.






Spuuëkskes van watte

Boeoeoeoeoe! Dees spuuëkskes zeen kej sjiek om veur 't raam te hânge mét vastelaovundj. Gae kintj ze hieël eenvoudig zelf make.


Wat heb se nuuëdig:

- * Wit pepeer
- * Zwart pepeer
- * Watte
- * Taw
- * Sjer
- * Plekbandj
- * Liëm



Wie deuse det:

Knip 'n spuuëkske oet wit pepeer en plek deze vól watjes. Daonao plekdje d'r met liëm 'n gezichtje op. Mét de plekbandj maakdje 't tawke aan de achterkântj vast om 't spuuëkske op te hânge!

Scan deze QR code om 't filmke te kieke woeë Alice, Elia en Lisa veurdoon wie 't mot. 





Jubileumprins Danny I



Beste Spoeëkejaegers en Spoeëkejaegerinnen,

Ich ben Prins Danny den Ierste,

Geboôre op de Bertiliastraat as zoon van Peter van de p-lies en gaef um van Jetje en Ria van Pie van Janus de Bekker en Jes van Bel van Laentje.


Ich heb twee groeëte breurs Pedro en Mario. Dèt zeen Spaanse name, mér os pap waas geine Sinterklaos en heet mich Danny geneumdj. As zoon van unne p-lies steit ut Spoeëkejaegers-blaw mich herstikke good en bin ich streng mèr rechtvaardig!

Ich woeën samen met Lisa Beej Polderte, un echte Prinsenbuurt. Det kins ze waal zeen aan die kaste van hoeëze die dao staan! En mét mien klein prinsesje geneet ich dao van ut oetzicht op de Leukerbeek onger ut motto: "Leuker kan ut neet waere, maar waal mekkelukker"!



Adjutant
Pieter-Bas
Litjens

Adjutant
Martijn Ogier



Ich doon uch weten dèt:

Ten ièerste: Vreuger woeëj ich gaer bekker of kok waere, mèt ich heb der hieëlemaol niks van gebakke! Daorum bin ich mer accountant gewoore. Dao haaj neemes op geraekendj!

Ten tweeëdje: Ich bin samen met miene compagnon de baas van N-XT advies. Dèt is un accountantskantoeër woeë wae os de vingers blaw houwe op ut raekenmesjienke. Daodoor betale de minse zoeë min meugelik belasting. Det is hieël get anders as Peter Gielen!

Ten derdje: Ich doon gaer spelkes met mien dochter Lisa. Mèt met memory verrees ich meestal, ich heb un geheuge as un zeef!Woeërom staon ich hieëj eigeluk?

Ten veerdje: Ich bewaak mien grenze good. Daorum bin ich grensrechter beej RKSJV. Dèt heb ich gelieërdj van Liba, dae waas meestal ouch neet snel genôgt om boetespel te zeen. Ich huûr ut hum nog zegge; "Jao, jao jong, de pûntje dao geit ut om!"

Ten vieëfdje: Ich bin al jaore leider beej KVV. Nao de Vlaamse kermis kom ich meestal van un kaoje kermis thoeës as ich weer wat te vól op heb.

Ten zesdje: Ich drink gaer un good glaas beer en heb dit jaor ut Mistig Wit van de Spoeëkejaegers gebrouwe. Dèt heb ich gewete wie-j ich beej Ger en Ellie in de slaopkamer stong. Mèt ich waas zoeë weer nuûgter wie-j ich Ger huûrdje rônke!

Ten zevendje: Ich gaon gaer touren met miene oldtimer. Ich kan der mer gein afscheid van neme. Ich fietsdje der al mét nao de kleutersjool!

Ten achtste: Ich heb ouch lang gevoetbaldj beej RKSJV, mèt door alle blessures veul ich mich noeë net as van Hanegem; De Kromme van Swartbrook!

Ten neugendje: Ich bin noeë schatkistbewaarder van de Spoeëkejaegers en heb langer naegel as Moosje, want de boôm is nog lang neet in zicht. Dus zoeë-as Klee al zagt: "Doot der eine von mir"!

Ten tieëndje: Ich bin un echte brokkemaker as ich drank op heb. Dao kan Rinus van de Tos euver mét kalle. Ich heb dao dèkker ut spoor gecontroleerdj of alle bielzen nog recht loêge.

Ten elfdje: Ich heb echt Spoeëkejaegers blood. Wie-j ich Jeugdprins waas in 1993 beloofdje Jan van Pietjes mich det hae adjudant zoeëj waere as ich groeëte Prins zoeëj waere. Mèt tegen veurzitter Harrie zag ich det ich det neet woeëj. Beide zeen neet oetgekome, mèt heej staon ich dan toch as eure groeëte Prins!

Daorum heb ich dit jubileumjaor de **Orde van ut raekenmesjienke** ingesteldj en gaon ich uch veur onger mien devies:



**Met deës daåg gein rapporte, mails of getalle,
mer deëze vastelaovundj gaon wae knalle.**



In gesprek mèt Jubileumprins Danny I

Resepsies

Op de Prinsereepsie stonge ze un beetje achterop de buun en stong de hieële Raod van Elluf nog op de buun. Mèr Jan van Pietjes en Klee deeje waal geweldjig heur bèst om de jeugd der beej te betrèkke. Aete waas der neet, jao wat broeëd mèt huidvleis, mer dèt vônge ze hieëlemaal neet lekker! Ze ginge allein mèt nao de resepsie van de Zootmaale en nao de Rogstaekers. Mer wie ze dao ôngerhalluf oor haaje staon wachtte, vong veurzitter Harry ut genogt en ginge ze nao de Foekepotters in Grathem via Nelly van Mies van Nolle Giel, want die haaj dao nog femiëlie woeëne!

Mèt de paplepel

Op unne late maandjig aovendj zitte wae saame aan de tafel in de aetkamer en kieke saame trök op zien oetroôping. Aafgelaupe zaoterdig waardje Prins Danny oetgeroêpe as 55e Prins van de Spoeëekjaegers. In de iërste plaats is Danny nateurlik geweldjig gruuëts op ut feit det hae de Jubileumprins 2025 is gewoëre. De vastelaovundj is hum mèt de paplepel ingegaeve en al gauw geit ut gesprek euver zien ervaringe as Jeugdprins van de Spoeëekjaegers in 1993. Dèt waas ouch ut jaor det Jan Sniijders Prins waas. En veur de sjriêver van dit stökske ouch un openbaring. Want alles waas ângers in dae tiêd! De Jeugdprins waardje namelijk nog gekoôze en begeleidj door de sjoël en neet door de vastelaovundj vereeniging! Saame mèt Jeugdprinses Nina (Janssen) ging hae veurop en ze haaje mer leefst drei-j ongerschei-jinge; De Orde van ut Voetballeke van Danny, De Orde van ut Zilver Stumke van Nina en saame de Orde van ut Spoeëke-hendje! Op de Boôntje Aovundj waardje de aojers nog ongersjei-je in de Orde van ut Zilver Sjoëlbelke! Dich zoeëts der bekans geine wiës mieër oet waere....



"Met deës daâg gein rapporte, mails of getalle, mer deêze vastelaovundj gaon wae knalle."

Hieël erg betrokke

As bestuurslid en sjatkistbewaarder môst Danny natuurlik goot oetkieke det der zich neet verkaldje, wie ze hum in Augustus al vroôge om Prins te waere. Mèt buurman Ger ging det hieël onopvallendj en ouch koste ze stiekum aafspraake make op kantoeër beej Danny, 's aovus as neemes dao waas. Danny heet as bestuurslid natuurlik alles oet de ieërste handj mèt gekreege en waas vanaâf ut begin hieël erg betrokke beej ut brouwe van ut Mistig Wit. Dit is dan ouch de roeëje draod door dit jubileum jaor.

En wie hae aan Lisa verteldje det hae Prins van de Spoeëkejaegers zoej waere, môst Lisa der van huûle; un droûm is oetgekoôme, veur allebeij!

Vorst Marc



Prinseresepsie

Beste Spoeëkejaegers en Spoeëkejaegerinnen,

Prins Danny I, jeugdprins Keano en jeugdprinses Zoë hebbe de ieër uch oet te nuuëje oppe Prinseresepsie vanne Spoeëkejaegers op zunjgmiddig 23 fibberwarie 2025 in 't Spoeëkepeliês MFA Corneel in Swartbrook.

Ut begintj om 13.00 oôr en deurtj tot 19.00 oôr. Veur dorpsgenoote is d'r van 13.00 tot 14.00 oôr de gelegenheid om de hooghede te felisitere.

Gae zeetj van herte welkom!



Jeugdprins Keano & Jeugdprinses Zoë

Keano

Ich woeën saame met os pap en mam en mien zusterke Chenoa oppe Coolestraat tusse Erik vanne Smeet en Dennis Pax. Wae hebbe un klocht hunj woeë gae bang van weartj. Det zeen 3 Chihuahua's veur ut kabaal en unne groeëte Boebus veur te waake.

Ich bin heej in 2017 koome woeëne en ongertusse un echte Spoeëkejaeger gewoore. Ich doon al jaore mit aan de vastelaovundj en det bevöldj mich good. Ich ving ut te gek det ich in dit jubileumjaor jeugdprins van Swartbook moog zeen.

Hobby's heb ich ouch, ich doon basketballe beej de Jumping Giants, loester gaer nao meziek en ving ut fijn om bezig te zeen. Daorum klus ich al aardig wat aaf. Dus as d'r urgens wat mot gebeure dan huuër ich det gaer!

Ich haoj van lekker aete. Ich lus zoeë good as alles! Veur sushi en pizza kinse mich 's nachts wakker maake. Volges os mam haoj ich veural van völ aete want die blijft boeëdsappe aant doon. Mèt os pap gaon ich waal uns karte, det ving ich gaaf. Verder amuseer ich mich mèt vrinj en gaef ich zoeë noow en dan extra fieëstjes beej os thoeës.

Ich kan neet wachte om mèt uch alle deze vastelaovundj veurop te gaon!



Zoë

Ich bin jeugdprinses Zoë, dochter van Mark en Joyce Vaes. Saame met pap, mam en mien 2 breurs, Luca en Milan, woeën ich oppe Rectorijstraot teegeneuver de speultuin. Dan heb ich nog ein hoeësgenoôt, mien leef hundje Nio. Dao knuffel ich wat mit aaf!

Vastelaovundj zitj beej mich inne familie. Miene naef Lars is jeugdprins gewaesj en mien aodste broor Luca ouch. Pap dae zitj inne raad van elluf en mam zitj beej de jeugdbegeleiding.

Verder kan ich nog vertèlle det ich sportief bin. Ich dans beej de Dancing Kids in Swartbrook onger leiding van Aniek van Bommel. Ouch turn ich beej Jan van Wieërt, en dao doon ich basketballe beej de Jumping Giants in Neejwieërt. Dit doon ich 3x kieër inne waek en zit saame met mien prins in ut zelfdje basketbalteam. Ich bin dus dèk in ein sporthal te vinje, dit heb ich van mien opa Harry Nouwen ge-orve. Dae zoot ouch altiêd inne gymzaal.

Ich haoj van gezelligheid mèt familie en vrinj. Unne daag d'r op oet, spelkes doon, film kieke of lekker örges oetaete. Ouch humor haoj ich van, ein daag neet gelache is un daag neet gelaeftj. Skincare en aan mien haor vreute huuërdj beej mien daagelike routine, det ving ich leuk om te doon.

Det ich mer dit jubileumjaor jeugdprinses moog zeen ving ich echt kei gaaf!



Keano en Zoë

Wae kinne elkaar al vanaaf de kleuterklas en zeen vanaaf toen al gooj vrinj. Saame hebbe wae al vanalles mitgemaaktj en dao zeen wae gruuëts op: van zwumles, boete speûle, fieësjes, logeerparteejkes, tot unne daag d'r op oet. Saame hebbe wae de groeëtste lol en giebele wat aaf.

3 jaor geleeje deeje wae alsof wae jeugdprinsepaar woore mer noow ut echt is vinje wae det waal hieël spesjaal. Wae gaon heej volop van geneete en maake d'r ein groeët fieëst van!

Wae hebbe de orde ingesteldj van 't Springendj Basketballerke.

En sloëte noow aaf onger os devies:

Mèt eine spróng en paàs, gaeve wae dit jubileum jaor vól gaàs.

ALAAF!

Jeugd Prinseresepse

Wae, jeugdprins Keano en jeugdprinses Zoë, hebbe de ieër uch oet te moge nuuëje op ozze resepsie op zaoterdig 15 fibberwarie 2025.

De resepsie is in de pauze van de Jeugd Boëntje Middig om 15.30 oôr in 't Spoeëkepeliês MFA Corneel in Swartbrook.

Gae zeetj natuurlik al vanaaf 13.00 oôr welkom, om te geneete van al det joonk talent!



Bonkie en bokworst



Der is aan os gevraagdj of wae get op papeer wille zette euver Bonkie en Bokworst. Veur de minse die ut neet weite; det zeen Johan Bongers en Marc Heijmans en gae moogtj zelf raoje weem Bonkie is en weem Bokworst! Wae hebbe un aantal jaore mét-gedaon met de Boëntje Aovundj met zelf verzonne stukskes en wae hebbe ouch same un aantal jaore de Boëntje Aovundj gepresenteertj. Waat hebbe wae un lol gehadj, veur en achter de sjerme!

"Neet te meujlik, gewoeën un beetje oet de losse pols zodét de minse get te lache hebbe"

De Boëntje Aovundj vulle

Ut begos der eigenluk met dét der op un gegaeve moment wat weinig stukskes woore om de Boëntje Aovundj te vulle. Dét kwaam omdet der een aantal artiesten, die al jaore met-deeje, der met stoptje en der nog onvoldoende aanvulling waas van onger-aaf. Dus zagt Bokworst tegen Bonkie: "Zulle wae det doon? Neet te meujlik, gewoeën un beetje oet de losse pols zodét de minse get te lache hebbe?"

Improvisere

Bonkie zoog det waal zitte, mér haaj nog neet in de gate dét ut echt un beetje improvisere waas. De ieërste kieër as balletdansers mét ut zwanemeer waas ut direct raak. Twieë groeëte kaerels in un balletpekske is natuurlik altieëd lache en zeker as ze vlak veurdet ze op mos gaon beej ut opwerme un groeëte sjeur in dien panty kriegs op kruûs-huûgdje! Beej de generale haaje wae eigenluk nog gein idee waat we precies zoeëje gaon doon op de bühne... Dus improviseren mér en minse oet de zaal der beej betrekke. Ouch dét woord un beetje os handelsmerk en de jaore daonao haaje minse soms al sjrik of ze nao boven moste komen of det wae de zaal in zoeëje gaon.



Oet de slurf loupe

De jaore daonao hebbe wae van alles gedaon. Un optreije met un circusact as olifanten leep ouch hieëlemaol oet de slurf. Bokworst haaj bedacht det wae un paar infuuszakken in ut pak zoeëje neije zoeëdet wae water koste spuite door de slurf. Wae haaje der allein neet aan gedachtj det die zakken al leeg zoeëje laupe door de zwaortekracht. Un groeët waterspoor op de bühne waas ut gevolg en Bonkie lachdje zich te burste, ouch wiej de microfoon nog aanstong achter de bühne. Haaj de zaal weer wat om te lache!



Simpel mér doeltreffendj

Wae hebbe un kieër un mop gespeuldj met un gastrol veur Marco Beckers, Wiel Douven en Geeske Donner. Un vrouw die in spreidstandj op de gynocoloog aan ut wachte waas en wae as sjilders der mer naeve laupe. Simpel mér hieël doeltreffendj.

Bokworste awards

En natuurlik de oetreiking van de Gouwe, Zilveren en Bronze Bokworst veur minse oet Swartbrook die stomme dinger haaje oetgevraete. Wae weite zeker dét Johan van Bommel de Gouwe Bokworst nog altieëd op zien nachtkestje heet staon.



"As wae same kinne speule, dan kinne wae ouch same presentere!"

Allein verder

Toen Gonny en Inge aangoofe dét ze nao un paar jaor ginge stoppen met ut presentere van de Boëntje Aovundj hebbe Johan en Marc dét euvergenome onger ut motto: "As wae same kinne speule, dan kinne wae ouch same presentere!" En dét heet de zaal gewete. Optreijens as Italiaanse toeristen en Schotten woeë-beej Johan in eine kieër in un gaat in de bühne verdween staon nog helder op os netvlies. Mér Johan goof op un gegaeve moment aan det ut genôg waas gewaestj. Hae haaj al allerlei angere taken beej de vereniging en al det improviseren en last minute werk van Marc kos hae der neet mieër beej hebben. Daarom presenteertj Marc noeë al un aantal jaore de Boëntje Aovundj allein, nog steeds mét völ plezeer, mér ouch al kiekendj nao un opvolger...

- Bonkie en Bokworst



Boôrebroeloft



Op zaoterdig 11 jannewarie zeen Kim Gielen en Joost Wanders oetgeroôpe as ut boôrebroedspaar 2025. Ouch is de rest van ut boôregezelsjap bekindj gemaaktj. Kim waerdj vergezeldj door heur aojers Patrick en Ellen Smeets en getuûge Anniek van Bommel. En Joost door aojers Peter Heijnen en Jolanda Dauphin en getuûge Gerrit Kemper.

Op zaoterdig 1 mieërt is de boôrebroeloft in 't Spoeëkepelîs. Noteertj deeze datum alvast in eure agenda. Gae wiltj dit toch neet misse?



Boôrebroed Kim Gielen

Miene naam is Kim Gielen. Ich bin 27 jaor en heej in Swartbrook geboôre en getoôge. Saame met mien aojers Peter en Annie, en breurke Joeri, woeën ich oppe Kapellestraot. In ut dageliks laeve werk ich as psycholoog beej Stichting Land van Horne. Mer gein zörg, boete ut werk om zal ich gein analyse loslaote op eemes woeë ich mèt aan ut kalle bèn.

In miene vreeje tiêd heb ich versjillendje hobby's, woeëvan völ met muziek te maake hebbe. Zoeë zing ich vanaaf kleins af aan in ut koeër Cantarella, neteurlik in Swartbrook. De muziek keumtj ouch trök in mien betrokkeheid binne de vastelaovundjsvereiniging. Wellicht hebt gae mich dèkker oppe Boôntje Aovundj gezeen, woeë ich mèt speul beej Pongelsop en de Boôntje Aovundj Band. Daonaeve moog ut opveure van un tenieëlstök, al vanaaf de Kinjer Boôntje Middig, neet ontbraeke. Verder ving ich ut errug sjiek det ich vanaaf veurig seizoen lid bin vanne Spoeëkejaegerskepel, woeë ich saxfoon speul.





Binne de Spoeëkejaegers bin ich vanaaf 2013 betrokke beej de organisatie van de Jeugdaovundj. Mer ouch beej anger vereiniginge in ut dörp vinj ich ut fijn om aktiviteite mèt te organiseere. Zoeë bin ich ouch leiding beej KinderVakantieWerk.

Ich geneet van ut sosjale laeve met vrinj en femiëlie saame. As ich nog tiêd euver heb, doon ich gaer puzzele, wanjele of series kieke. Euverige feitjes van mich: ich bin unne enorme kaojkleum, ich haoj van structuur, en alvast un ekskuus nao miene broêdegom; 'te boors aete' (aerpel, booremoos, erwtesop) vinj ich nèèt lekker.

Boôrebroedegom Joost Wanders

Miene naam is Joost Wanders. Ich bin 31 jaor geleeje geboôre in Heeze en daonao opgegruûtj in Altwieërt. Saame met mien vriendin Chantal Bongers en ozze zoon Lucas, woeën ich op de hoök van de Ittervoorterweeg/Coolestraot. Heej haoj ich ut dieët van vól dörpsbewoeëners strak inne gaate. Op dinsdig aovundj ein bruuëtje döner beej Ali. Op donderdig in de reej beej de frietker en op vriêdig ouch nog ins vörse vlaai vanne bekker. Ich zeen ut allemaol !

Door de waeks werk ich in Sittard beej wuuëningcorporatie Zowonen. Vanoet de aafdeiling ongerhaod, zörg ich d'r veur det alle vastgood data in orde zeen én blieve. Heej veur volg ich ein strakke planning en maak ich doortastendje analyses. Thoês is det andersom, krieg ich soms te huuëre,

Verder ben ich dèk te vinje op ut voetbalveldj van RKSVV. Vanoet Altwieërt bin ich via gecombineerdje jeugdelftalle al in 2006 terecht gekoômte op de Swartbrookse veldje in ut oranje-zwart tenue. Nao hieël wat jaore beej ut twieëdje elftal, staon ich de lèste jaore dèkker op de liêst van 't ieërste. Mien vaste positie is, net as thoês, oppe bank. As ich dan toch in ut veldj staon, dan doon ich det mèt vól plezeer op ut middeveldj.

Missjien hebtj gae mich ouch waal ins gezeen mèt de tuba beej de Spoeëkejaegers kepèl. Ich heb namelik ouch ein aantal jaor mèt gebloaze. Allewel speul ich mien deuntjes oppe piano, hoewaal dae van Chantal, zoeë snel meugelik ut hoês oet maag. (wiltj emes toevallig eine zwarte, valse piano?)

Ich heb gehuuërdj, det mien broêd neet van aerpel, boôremoos of erwtesop höltj. Gein probleem, ich staon gaer inne keuke en anders staeke wae de straot euver en haale wae ein bruuëtje döner beej Ali!



Buurvraw & buurvraw

Wae zeen buurvraw Sandra en buurvraw Eefke. Det haotj in, det wae veur eedere nówwwe dörpsroddel de deur beej elkaar plat loûpe. Wae kinne uch vertelle, waat heej op 't boôrelandjsjap gebeurtj. Vandaar det ze os waal de gesjiktje persoeëne vônge om 't stèkske van Lars en Laura euver te neme om de boôrebroeloft te presentere.

Inburgere

Buurvraw Sandra is geboore en getooge in 't dörp. Buurvraw Eefke heet Neejwieërt ingeruildj veur unne Swartbrookse boôr en is toen op inburgeringscursus gegange beej buurvraw Sandra. As ongerdeil vanne cursus heet Eefke geliêrtj waat eine boôntje aovundj in holtj. Vanaâf toen zeen wae same te bekiêke in 't spoëketheater.

Veur de verkieërdje deur staon

Buurvraw Eefke is ouch de vaste oppas vanne buurhoôndj Coco. Daodoor zijt ze soms ouch waal ins veur de verkieërdje veurdeur. Coco dan hê. Hae raaktj d'r soms van inne wer.

Boôre spotte

Op ein gegaeve moment vong buurvraw Eefke, det buurvrouw Sandra mieër vanne werreljd most zeen. Om dit röstig op te bouwe, leek het heur ein goôd plan te beginne beej ut boôrelaeve örges anders in ut landj. Daorum zeen wae saame boôre gaon spotte oppe zwarte Cross. En waat deenk se? Kwoome ze zelfs dao dörpsbewoeëners tege. Ut veurdeil: weer get nòw roddels opgedaon!

Wiênleefhebbers

Gae kintj os trouwes ouch kinne as boôrebroeëd en prinses van veurig jaor. Dit hebbe wae ouch goôd geviertj. Omdet minse os hebbe ingesjatj as wiênleefhebbers, kinne wae heej nog ff op teere... saame nateurlik. Gaef os wiên en gae kriegtj gezellige kâl. Deze kâl haoje wae neet gaer mieër veur os zelf, mer gaon wae deile met de rest van Swartbrook. Det doon wae gaer oppe boôrebroeloft op zaoterdig 1 mieërt. Tot dan!

Bij Polderte

De leukste buurt van Swartbrook



Steek op, heuptasje om en vier samen vastelaovendj!

Spaar voor gratis vastelaovendj-items.

Versier jij de mooiste steek?
Bekijk snel de winactie op
www.ahheerschap.nl/vastelaovendj
en win!

 Heerschap
www.ahheerschap.nl/vastelaovendj



N-XT wînsj uch unne sjoëne Vastelaovundj!



nxt



Poster

Oppe volgendje pagina stieët un sjoëen foto vanne prins met zien adjudante en de jeugdprins en jeugdprinses. Dees poster kinse oet de gezèt hale en veur ut raam of bove dien bed plekke. En daonao kinse nateurlik derest van de gezèt laeze.





De Spoekejagers
5x11
2025
Orde van de
Swarth
SPEEL
5 JAARS

ADJUDANT

Swarth



frans klus en montagebedrijf vof
frans van riet
houtsberg 7
gas water cv elektra



De Burgervader en First Lady van Wieërt

In gesprek met Raymond en Wilma Vlecken



Nao 'n ontzettendj sjiek Oktoberfest in Ubach Palenberg, unne buute aovundj in Swartbroek en nao wat activiteite roondj de Närrische Europäische Gemeinschaft, is der toch waal unne speciale bandj ontstânge tösse Burgemeister Raymond Vlecken en Swartbroek. Daorum leek 't os as redactie sjiek, om veur os Swartbrooker Spoeëkegezèt in gesprek te gaon met ozze burgervader en zien vrouw Wilma.

Nówjaorsborrel

Op 3 jannewarie op de nówjaorsborrel van de gemeindje Wieërt, waas ich (Lars) aanwezig, saame mèt Laura, Pieter en Manon names de Spoeëkejaegers en met Miep, gruuëtse bezitster van 'n lintje. Dao hebbe wae geloesterdj nao de speech van de Burgemeister en gekeeke nao de onthulling van de vastelaovundj medaille van Wieërt veur de titel Vastelaovundj hoofdstad 2025. Tot slot hebbe wae os ouge oetgekeeke, wie sommige genuuëdigdje zich de nek vol duûdje mèt de hépkjes van de cateraar. Op dees reseptie heb ich een afspraak gemaaktj met Wilma om 'n tas koffie te gaon dreenke en te kieke, weem is de vrouw naeve de burgemeister.

"Jeh dich kriegs gewoeën unne mok!
Det is toch waal goôt?"

Koffie dreenke

Op de kaoje deensdig aovundj inne ieerste waek van 2025 waas 't zoeë wiêt. Ich beldje aan en Wilma deej de deur enthousiast ope. "Hallo welkom! Leuk desse der bès". Miene jas waerdje opgehange en ich waerdje wieter gedirigeerdj richting de kamer. Dao zoot de burgemeister waat te laeze aan taofel. Hae stong op en goof mich drek ein korte rondjleiding door t sjoëne ruume hoês op Bosseve. "Woeë gaon we zitte?" vroeg Wilma. "Jeh gewoeën oppe bank", en dacht ângers is 't zoeë un kruûsverhuur! "Wilse koffie?" en ich knikdje jao, woeë op Wilma zeet, "jeh dich kriegs gewoeën unne mok! Det is toch waal goôt?" Net asof ich as dörpse jông koffie dreenk met ein tas en sjuttelke... Wae zatte os en ich verontschöldigdje mich eigenlijk. "Nôw zitj gae waarsjienlik op de eîningste daâg det gae fein same op de bank kosj zitte, ouch nog mèt mich opgesjeeptj". "Jao, dich hebst de jackpot, Raymond is eigenlijk noeëts thoês", kloônk de reactie.

Opa en oma

Eine mok koffie, lekker stökske abrikoeëze vlaai van Bakkerij Heerschap en 't gesprek waas in volle gang. Vól trots wees Wilma richting ut digitale fotoliêstje, det naeve ein aantal broonze bieëltjes op ut tillevisie meubel sting. "Kiek! det is ozze ieerste kleinzoon van os dochter Judith". Sinds 30 september zeen Raymond en Wilma trotse opa en oma.

Laes verder oppe volgendje pagina >

Ein spontaan interview

Zoeë als de meeste mich kinne, haaj ich mich neet echt veurbereitj, mer goof aan: "dit mot mer ein spontaan interview waere", en begost wat vraage te stèlle. "Werks dich eigenlijk naeve 't fulltime vrouw van de burgemeester zeen"? Ich kreeg drek antjwoord det ze ein drökke vrouw is met waal 4 bane. Wilma werktj beej de Reclassering, is fulltime moöder en oma, hoêsvrouw en mèt unne lach op heur gezicht zeet ze:

"Ich bin de first lady van Weert"



Ambtenare vastelaovundj

Raymond kreeg tillefoon en leep weg, heur zoôn Stijn, inmiddels 23 jaor, voetbaldj nog in Haerle beej RKS V Bekkerveld. Hae haaj weer last van ein blessure. Stijn is, toen ze verhoesdje nao Wieërt, mèt verhoestj op 20 jaorige laeftiêt. Wilma haaj zichzelf ouch eine mok koffie gezatte en kwoom naeve mich rechts oppe bank zitte. Raymond zoot leenks op 'n anger bank met ziene tablet en vertèldje onger angere euver ziene tiêt as Burgemeister in Landgraaf. Al gauw ging 't euver de vastelaovundj wie 't dao gevierdj waerdj. Zoeë weurdj dao eder jaor ambtenare vastelaovundj gevierdj. De hieël gemeindje, eder aafdeiling, echt alle collega's kooome in actie en der weurdj unne soort Boontje Aovundj gedaon.



In Landgraaf is de sleuteloverdracht ouch waal ein groeët evenement. 't Lèste jaor det Raymond dao as burgemeister woor, heet hae de sleuteloverdracht als Drag Queen gedaon. De foto waerdje derbeej gepaktj. Beej gestange door Pieter, ouch waal Patty PamPam, waerdje van unne burgemeister in pak, un fleenke pöl gemaaktj met ougsjaduw, pruûkske, ein groeët kleid en dao waas ze dan; Raymond waas Ramona gewoore.

Ozze burgervader is eigenlijk overal waal veur te paai-je.

Van ut mètloûpe inne optochte saame mèt de pastoeër, verklei-dj as Sinterklaos en Körstman, tot 't verklei-je as roze pop van Pinkpop. Ozze burgervader is eigenlijk overal waal veur te paai-je. Wie ich vraog wat ut hoogtepuntj van de vastelaovundj in Landgraaf waas, waas 't de vastelaovundj mis op Sjaesberg. Ich vertèldje det det vreuger in Swartbrook ouch altiêt herstikke sjiek woor, en det ozze pestoeër Dorresteyn ouch unne echte vastelaovundj veerder waas.

Wieter is de vastelaovundj in Landgraaf wat lossere as in Wieërt. Heej is alles wat strakker en ouch wat statiger. Verder zeen in Parkstad ouch dames groepe. Ein komplieëte dames raad van elf, en ouch ein dames gezelsjap veur het Auw Wieverbal de Koetsche Grûskes.

Alcohol vreej

De mok koffie woor leeg, vlaai op en d'r waerdje gevraagd of ich nog wat anders woeëj drenke. Wiên? Beer? "We hebbe alles in hoês". Ich vroeg waat zeuj gaer droônke. Wilma drenktj allein cola of water. "Noeëts alcohol", dao vingtj ze gewoeën niks aan. Ich grapdje nao Raymond, "Huwelijkse voorwaarde?" mer hae droônk ouch dèk alcohol vreej. Ich euverleg wat mèt Raymond en de keuze veel op un 0,0% bloedj pilske.

Hieël hard mèt kaake

"Waat vingtj gae heej in Wieërt van de vastelaovundj dan, vroeg ich? "De muziek is anders" waerdje gezagtj. "Wieërt heet ein hieël eige muziek industrie." Dae muziek haai-je ze dus in Parkstad nog noeëts gehuurdj. Wilma zeet: "en der is niks sjoëner om hieël hard mèt te kaake mèt liedjes, mer ich kin ze heej in Wieërt neet". Stefan Wolter haai-j op de boontje aovundj op Bosseve, Wilma unne kieër op het podium geroôpe om same ein liedje te zinge. Det waas gein gemakkelijke vraag, mer oeteindelijk hebbe ze same 't liedje van Lex Uiting gezônge.



Aktiviteite bezeuke

't Sjoëenste in Wieërt zeen alle aktiviteite veur het vastelaovundj weekend zoeë as de boëntje aovundje en de resepsies. Die gaon ze dan ouch ein aantal bezeuke. Waarsjiênlik zal hae ouch met Wilma op 14 fibberwarie in Swartbrook langs kome veur de Boontje Aovundj in 't Spoeëkepelîês. Ouch mèt ut Prinsetrefte zulle ze van de parteej zeen.

"Soms kin ich hum waal achter 't behang plèkke"

Nog verleeftj

Mien kladblökske lag ich aan de kantj en we hebbe ut nog euver heur zelf gehad. Raymond en Wilma zeen al ruôm 35 jaor same en getrouwdj in 1991. Wilma geit zoeë vól meugelik met. Op mien lèste vraag, "besse nog verleeftj?" zeet ze volmondig jao, mer soms kin ich hum waal achter 't behang plèkke". Ze lache wat en ich zèk "det is beej uch neet anders as beej os".

We hebbe as aafsloëter nog ein bloedj pilske gedroônke, woeë nao ich ze bedanktj heb veur 't gezellige, losse gesprek, de sjoëen foto's en de filmpjes die ich heb moge bewoonjere.

Burgemeister Raymond en Wilma Vlecken, nogmaals hêrstikke bedanktj! Wae as Swartbrooknare moge gruuëts zeen op unne burgervader wie gae.





Jeugd Boëntje Middig



De jeugd boëntje middig is unne middig dae al jaore speciaal veur de jeugd van Swartbrook waerdj georganiseerdj. De jeugd kan zellef keeze wat ze gaer aan os wille laote zeen op de Bühne. Dit kan un sjoëen tonieëlstukske zeen, mer zeker ouch un zang of dans optraeje. Un optraeje wat wae al jaore zeen trök koomme op ozze jeugd boëntje middig is de Dancing Kids onger leiding van Aniek van Bommel.

Opgaeve veur
de boëntje
middig

Jeugdprinserepsie

Omdet deze middig georganiseerdj waertj veur de jeugd van Swartbrook moêge we ozze jeugdprins en jeugdprinses neteurlik neet vergaete. Daorum hebbe we in de pauze un jeugdprinserepsie woeëdet ozze jeugdprins en jeugdprinses gefeliseerdj kan waere.



Auch mit doon?

Zaoterdigmiddig 15 fibberwarie om 13.00 oôr begintj deze middig! Hebs dich noow bedachtj om auch mit te doon mét de jeugd boëntje middig? Gaef dich dan snel op door de QR-code te scanne en ut formulier in te vulle! Alle kinjer (tot 16 jaor) die wille optraeje kinne mit doon. Opgaeve kan tot oeterlik 2 fibberwarie.




Spoeëk jaage

In de Krang zien we ut spoeëk kwieët geraaktj. Soms lieëktj de Krang waal un doolhof veur de Spoeëkejaeger. D'r is mer eine gooje weeg dae wae kinne volge om ut spoeëk te vange.



Vings dig de weeg van de spoeëkejaeger nao ut spoeëk?



Vastelaovundj Horoscoop

De vastelaovundj kan un onveurspelbare tieëd zeen. Gelukkig hebbe de Spoeëkejaegers un sterke bandj met ut heenaomaals en is ozze veurzitter un échte woarzegger. Hae veurspeltj veur alle Spoeëkejaegers en Spoeëkejaegerinnekes un sjoëne vastelaovundj. Mer hae zuutj ouch anjere dinge in de sterre....



Ram (21 mieërt - 20 april)

Komendje vastelaovendj giesse der hieel vör, ram van de kaart, en de drankkaart van boven tot onger alles gepreuftj. Mer kiek waal oet asse nao hoees lups veur dea man met de hamer. Want dae ramtj uch der eine wie desse nog noeëts geveuldj hebs.

Stier (21 april - 21 mei)

Nao de flater van veurig jaor heet de stier de roeëje zakdook in de reenk gegoeëitj. Nao dae fleenke kopstoet durfdje hae zich neet mier in de vastelaovundj arena te vertoeëne. De stier haaltj un dikke vlaai beej de bekker in Ell en zetj dao toeës un vörs gezatte tas koffie beej. De kastelein kan aan uch geine roeëje cent verdeene.



Tweeëling (22 mei - 21 juni)

Dit jaor oppe tieëd de kroeg in, want om 16:00 begintj ut happy hour. 1+1 gratis, dubbel zoeë snel zaat en det veur de helft van ut geldj. Op 't indj van de aovundj meinse neet 1 mer 2 sjoëne prinsesse aan de haok te hebbe geslaage, gae hetj de nacht van eur laeve. Smurges einmaal wakker blieëke die 2 prinsesse, 1 lieëlikke heks te zeen.

Kreeft (22 juni - 23 juli)

Kreeften hange dit seizoen weer constant aan ut buffet. Ze biëte zich vast aan de hoog vanne toog om zoeë op pole position te zitte dao vlakbeej de tap. Eeder anger dae iets wiltj bestelle zal euverstumtj waere door de schrieuw vanne kreeft. Mer knappe maagde let op, raak neet verstriktj in de klauw vanne kreeft.



Leeuw (24 juli - 23 augustus)

De leeuw, die regelnaef, heet ut volledige schema van ut vastelaovundjseizoen naeve zien bed gehange. Mèt zien lange manen en zien sterke veurkoome is hae un gaer gezeene gast oppe dansvloer. Ziene draum is om oeëts prins te waere zoj dit jaor zoemer kinne oetkoome. Mer lèt op, hoogmoed komt voor de val, en kiek oet beej ut bestelle aan de bar veur de sjeëre vanne kreeft.



Maagd (24 augustus - 23 september)

De maagd geit mèt un good gevuldje beurs op stap, mer veurdet de maagd de deur oet geit is ut sjoeënste pekske mèt zörg saamegesteldj.

As de maagd un leeg glaas beer heet dan zulse det de rest vanne aovundj huuëre. Zörg dan aug det ut glaas van de maagd snel gevuldj waertj. Mer pas op! Beej te völ beer kan de maagd heur maagdelikheid verleeze en zoemer un twieëling krieëge!



Waegsjaol (24 september - 23 oktoeëber)

Deze vastelaovundj steise veur un dilemma. Geise veur 1 of 2 pilskes, geise veur 1 of 2 frikkedelle speciaal, pakse unne groeëte of kleine friet. Gelukkig as waegsjaol kinse erg gooj aafweginge maake en zulse alles pakke wasse pakke kins. Dich laefs toch mer ins.



Schorpioen (24 oktoeëber - 22 november)

De schorpioen deinstj nurges veur trök. Jaegermeister, Schrobbelèr, Apfelkorn of un Mistig Wit? Mit welk drenkske dien glaas gevuldj is, en dig kriegs m neet weg, beedj de schorpioen zich aan om te helpe. Door zien grenzeloze belangstelling veur drank kinse beej de schorpioen thoeës de meist merkwaardige flesse drank aantrefe en flink onger de ker koome.



Boogsjutter (23 november - 22 december)

Dit jaor weer mis, det lekker deenk woeë desse eur pieële op gerichtj hebs, luptj mèt unne boog om uch haer. Mer bin neet getreurdj, 'n schoeën maagd heet heur pieële misschien waal op uch gerichtj en nao zat drank sjutj die zeker neet met unne losse flodder.




Steenbok (22 december - 20 jannewarie)

Dae zuinige steenbok probeertj zoeëvöl meugelik op de tes van unne angere te zoëpe en zaat te waere. As zien glaas bienao leeg is wachtj hae altieëd mèt ut neeme van zien letste slok, zoeëdet wannieër de schorpioen zien glaas leeg heet hae ut volgendje rundje zal haale. Mer let op det hae dien glaas neet leeg drinktj!



Waterman (21 jannewarie - 18 fibberwarie)

De waterman probeertj dit jaor drueëg te blieve staon. Hae vraogtj zich waal aaf op welk gebied. Drank? Of iets anges.... Kiek ouch dit seizoen weer oet mèt geldj oetgaeve, want in dees tieje is ut al lestig zat om eure kop boove water te haoje.



Vissen (18 fibberwarie - 20 mieërt)

De viêver is leeg dit jaor. Geine hiëring en ouch geine paoling, en al zeker geine bökkum, gae visj dit jaor weer achter ut net. Mer good noëts, der is zat te dreinke, en dao bisse zeker neet vies van. Want vis mot zwumme





Mistig Wit

In de vreuge murge van 22 augustus 2024 waas ut zoeë wiët, saame mit de penningmeïster mocht ich getuûge zeen van wiej oôs eïge jubileum beer waerdje gebrouwe, ut Mistig Wit!

Spoeëkechtig beer

Woeërom Mistig wit? Eederein oet Swartbrook witj det ut inne Krang spoeëktj! Al hieël lang geleeje zooge de Swartbrooker minse tösse ut Krangerbosse spoeëke hout, dwaallechte en mistige witte sjîmme. En omdet beej de Spoeëkejaegers beer en legendje nauw mit deindânger verbonje zeen, laag de naam Mistig Wit veur de hântj. En det ut Mistig Wit kan zörrege veur un mistig zicht en spoeëkechtige gaâte in ut geheûge... zeen der mit ut Buut culinair al versjillendje achter gekoômme.

Vastelaovundj inne brouwkeêtel

Mer éfkes trök nao ut begin, as ieërste heet un groepke beer leefhebbers beej de Brouwschuur de smaak bepaaltj van os Mistig Wit, de kleur waas al bekintj.... Mistig wit! Op 22 Augustus waàs ut dan zoeë wiët, nao det wae zëllef de zèk mit gerst inne brouwkeêtel haaje gesjötj, kon ut fieëst begînne. In dae keêtel is ut sjuust as vastelaovundj, der gebeurtj van alles en noch get! De gerst geit unne polonaise loûpe mit ut water en de temperatuur luiptj

op! Ut waertj langzaam aan unne haole klot in dae keêtel en dan... HOP HOP HOP.... sjuust, ut water is alcohol gewoore! Nao det Meisterbrouwer Erwin Strijbosch zien vakkundjigheit haaj laote zeen..... waasj tieët..... om ut beer te laote röste!

Ut resultaat

Nao veer waeke wachte koste wae beginne mit ut bottele en de door Eefke ontworpe etikette oppe flesse te plekke! Ut resultaat moog der zeen en wae vinje ut geweldig sjoeën det wae ut Mistig Wit in os jubileum jaor aan uch kinne presentere!

Te kaup beej:

- Eetcafé Bî-j Sanne
- Restaurant de Tos
- Hoeve Lieshout fietscafé
- Boerderijwinkel
- De Kweeckerij
- Spar Derksen



Proost op eur
gezoontjheit!
- Pieter van Gijn

Móssele "Mistig Wit"

Mistig Wit kinse zoë lekker dreenke, mer se kins d'r auch un hierlik recept mét make. Scan de QR code om 't filmke te kieke woeë Sjef Kok en Kristel vanne Tos veurdoon wie 't mot.



Ut recept

Speul de móssele good zuûver mét water en verdeil ze euver 4 penkes. Maak de greuntjes zuûver en sneej de eunje en prej in hâlf ringe. Rasp de muuërkes en sneej ze in dun plekskes. Verdeil de greuntjes euver de penkes mét móssele. Doot d'r wat kleingesneje eundjepiêpkkes beej. Doot d'r nao eige smaak veskrujje, paeper en zaot beej. Sjöd in eder penke 'n fleske Mistig Wit. Zét de móssele op 't veûr mét de déksel d'r op en kook de móssele in óngevieër 6-8 minute gaar, tot alle sjaale ope zeên. Sjöd tössedoor de penkes om.

Maak in de tösstiêd 't sausje. Ming de mayonais mét de mosterd, 'n klein sjeutje azien, sokker, cetrozenrasp, fiêngesneje eundjepiêpkkes en bring op smaak met paeper, zaot en 'nne aetlepel veskrujje.

Haal de móssele van 't veur en serveer mét 't sausje. Lekker mét friet en/of broeëd!

Aet smakelik!

Mét culinaire groet Sjef Kok en Kristel

P.S. löktj 't thoês neet? Kom ze dan gezellig beej os aetel!
Inzet: gerecht bij de Tos á 28 euro

Wat heb se nuuëdig:


Veur 4 persoeëne

- * 5 kg móssele
- * 1 speer prej
- * 4 muuërkes
- * 2 eundje
- * Veskrujje
- * 4 fleskes Mistig Wit
- * Paeper en zaot
- * 8 aetlepel mayonais
- * 3 thieëlepel mosterd
- * Azien
- * Sokker
- * Rasp van 'n cetrozen
- * Eundjepiêpkkes (bieslook)

RESTAURANT
deTOS
EST. 1959

Puzzele

Met alle onnøezele kal deze vastelaovundj is ut good om de grieze massa aaf en toe oet te dage. Daorum heej twee hersekrakers.



Horizontaal

3. De naam van de maakster van ons monument
4. De voornaam van onze eerste prins uit 1971
6. Dit zegt de vorst voor een onderscheiding
8. Het schoeisel dat de Boôrekapel draagt
11. Hiermee komen ze langs de deur voor de Spoeëkejaegersloterij
12. Benaming van de hoogheden tijdens carnaval
14. Maand waarin carnaval begint
16. Dit heeft de prins altijd vast in zijn hand
17. Dit trekt op carnavalsdinsdag door de straten
19. Weertse wijk wiens bewoners met carnaval de Schöäpket heten
23. Dit geeft de prins als onderscheiding
24. De functie van Marc Heijmans tijdens carnaval

Verticaal

1. Vervoersmiddel waarmee we naar recepties gaan
2. Instrument van de kapel dat het ritme aangeeft
3. Dit smeer je op je gezicht tijdens carnaval
4. Naam van de dirigente van de Boôrekapel
5. Het officiële carnavalsgetal
7. Dit zal het boerenbruidspaar in het onecht doen
9. Dit gooit de prins van de wagen naar het publiek
10. Het aantal keer 11 jaar dat de Spoeëkejaegers bestaat
13. Dit gedaante woont in de Krang
15. De naam van het Spoeëkepils
18. Het dorp waar de Bokkerieyers vandaan komen
20. Het dorp waar de Moeërebuuk vandaan komen
21. Dit hebben de raadsleden op hun hoofd
22. De buuttekampioen van Swartbroek

Q	M	L	Z	G	N	P	L	O	L	Q	L	A	P	P	A	B	N
N	X	P	R	I	N	S	L	E	M	E	Z	I	E	K	N	M	Q
V	A	K	Q	L	O	L	P	U	D	J	U	C	Y	T	P	B	N
J	I	L	Ë	I	A	Ê	O	T	V	E	H	I	R	V	E	O	E
E	A	I	A	E	K	A	Y	H	T	I	O	O	V	P	O	O	D
U	B	B	I	A	O	S	Z	T	P	S	M	I	M	F	P	C	H
G	O	A	S	Q	F	P	U	S	T	P	O	O	O	T	E	W	N
D	R	L	N	S	H	U	S	V	E	X	L	X	O	S	Q	M	K
P	R	L	I	O	B	R	E	T	I	K	A	C	I	B	S	O	T
R	E	O	R	B	Q	S	R	N	G	S	H	A	A	E	O	P	W
I	L	N	P	R	V	R	Q	E	A	T	N	U	W	R	N	E	V
N	P	N	D	E	Y	E	F	V	E	O	E	K	B	S	S	N	P
S	L	E	G	G	F	G	G	T	L	B	N	T	E	I	I	H	I
E	A	S	U	N	T	N	W	O	B	I	R	S	Q	P	N	U	T
S	N	X	E	A	F	I	P	O	M	A	N	K	D	U	A	B	C
P	K	R	J	R	H	L	G	H	W	I	U	H	H	R	S	Q	P
O	K	K	W	K	B	S	C	S	R	C	O	N	F	E	T	T	I
X	K	T	L	S	A	S	W	P	J	R	W	A	A	G	E	J	U

- Alaaf
- Ballonne
- Beer
- Borrelplank
- Buhne
- Buutte
- Chips
- Confetti
- Jeugdprins

- Jeugdprinses
- Klompe
- Krangerbos
- Kêpel
- Meziek
- Optocht
- Polonaise
- Prins
- Prinses

- Saxofoon
- Schmink
- Sinas
- Slingers
- Spoeëk
- Swartbrook
- Trompet
- Waage
- Zaal





De legendje vanne Spoeëkejaegers

't Waas 'nne kaoje hêfstaovundj in 't klein dôrpke Swartbrook. 'n Fluusterendje wîndj wei-jdje door de kale tek vanne buim. De maon hing lieëg aanne hemel, hâlf verbôrge achter 'nne dunne sluier van wôlke, en werbdje 'n spoeëkachtig leecht euver 't kêrkplein. De meeste minse zote thoês mét de gerdiêne dicht enne stoof aan. Allein 't klein kefeeke aanne rândj van 't plein waas nog oop. 'n Hândjvôl men haaj zich dao verzámeltj veur 'n létste pilske.

Jan waas d'r êine van. Hae stóng bekindj om zien stêrke verhaale en groeëte kêl. Dae n'aovendj haaj hae mieër gedrônke as anders, missjien om de kaoj van zich aaf te sjôdde, of missjien om wat anders te vergaete – iets wat hae noeëts zoj wille tówgave, zelfs neet aan zichzelf. De kêrkklok sloog elf kieër wie Jan wânkeldj nao boëte leep. De frisse locht sloog 'm in 't gezicht en hae

veuldje de wîndj ónger ziêne jas kroepe. Hae zuchdje deep, trok ziene kraag omhoeëg en sloog de bospaad nao de Krang in. Hae haaj gein haost; de wêrrel dj leek te drei-je en te gólve ónger zien veut, en hae wis det hae meujte zoj hebbe om de weeg nao hoês te vînje.

't Paedje door de Krang waas smaal en krônkelig, en de buim leke in 't dônkelt te laeve. De tek zwejdje in de wîndj, en ze leke te dânsen op un onbekîndje melodie. De blaar, verkleurdj door de wîntjer, ritseldje oppe grondj en bedékdje het paad mét 'n tapijt van gerosje kleure.

Jan strómpeldje wieter mét 'n onröstig gevoel in ziêne boëk. Hae kósj neet hieëlemaol plaatse, mer iets aan 't bós leek anders dae aovundj. 't Waas of de buim hum aankeke en de sjeem dônkelder en dreîgendj waas dan anders.

Plótseling, midde oppe paad, huuërdje hae wat. 'n Geluid, nauwelijks huuërbaar, mer haard genug om hum te laote verstiëve. 't Klônk as gefluuster, as 't geluid van wîndj door de blaar, mer auch... neet hieëlemaol. Jan drêjde zich om, ziên auge half dichtgeknepe om iets te kunne zeên in 't duuster, mer d'r waas niks. Allein de buim... De wîndj, dae leek noow waal te huuële in plaats van te fluustere.

Hae lachdje zenuwechtig om zichzêlf gerösj te stêlle. "'t is gewoeën de wîndj," moompeldje hae, "gewoeën de wîndj."

Mer wie hae zich omdrei-jde om wiejer te loupe, zoog hae wat oet ziêne aughoök – 'n glîmp van wat wits, iets det snêl bewoog tösse de buim. Hae stópdje en keek in de richting van 't mistig witte sjiensel. Mer 't waas wég. Jan sjödje ziêne kop, zichzêlf wiesmâkendj det 't gewoeën ziên verbieëldjing waas, gehôlpe door de alcohol en 't duuster.

Mer de onröst in ziêne boeëk waardje groeëter en groeëter. Hae veuldje de häörkes in ziêne nek omhoeëg kome en ondâns de kaoj, begós hae te zweïte.

En toen, zónger waarschuwing, huuërdje hae 't weer – 't gefluuster. Mer dit kieër waasj kórterbeej, bekans aan z'n oeër. Jan's hert ging weeldj tekieër en hae keek in paniek om zich haer.

En dao, tösse de buim, dao stónge ze. Gehuldj in 'n waas van wit leecht, hâlf doorzichtig en zwevendj bove de grondj. Met bleïke gezichte en zwarte auge. Ze bewoge langzaam, mét veuroet gestoke henj, as of ze 'm woeëje griêpe.

Jan hadje nao aom en zat 't op 'n loupe. Ziên bein protesteerdje beej edere stap, mer hae bleef doorloupe. Hae struukeldje en veel oppe grondj, mer stóng gauw weer op. Achter zich huuërdje hae 't gefluuster steeds haarder waere. Hae waagdje 't neet om achterom te kieke, bang veur wat hae zooj zeen.

Ziene aom kwoom in schokkendje stoeëte wie hae de rândj vanne Krang bereikdje, het leecht van zien hoês wieterop flikkerendj as zien bake van hoop. Hae veuldje de kaoj henj bekans op ziene rök, de aom vanne spoeëke in ziene nek, en mét zien lèste krachte rendje hae de ope vlakdje op, wég oet de Krang en wég van alles wat dao roondj spoeëktj.

Wie hae zien hoês bereikdje, dreij-dje hae zich om en zoog.... niks. Dao waas de Krang, stil en onsjöldjig in 't maonleecht, zónger 'n spoor vanne spoeëke die hum achtervolgdj haaje. Jan veel op zien kni-jje, zien liêf riejerdje van oetputting en sjrik. Hae dörfjde nauwelijks te geluive wat hae net haaj metgemaaktj. Wore det echt spoeëke, of waanbieeldje van 'nne dronke mins? Hae wis ut neet, mer ein dînk waas zeeker: hae zooj noeëts mieër de weeg door de Krang nao hoês neme, neet overdaag, en al zeker neet 's nachts....

Mer 't gefluuster bleef, zaocht ritselle de blaedjes as 'n ónoetgesproke waarschowwing veur ederein dae dapper of stóm genug is om 't paad door de Krang te neme, as de nacht valtj en de sjeem zich verzameldj ónger de buim.

Interview mét 't spoeëk



Wie lang woeëns dich al inne Krang?

Ich woeën al 55 jaor mét völ plezeer inne Krang, mer as ich same mét alle minse oet 't dörp Vastelaovendj moog vere, veul ich mich pas echt in mien element.

Wie zeetj gae 't boegbieldj vanne Spoeëkejaegers gewore?

Op de zaoterdigaovundj veur Vastelaovundj, 55 jaor geleje, leep ich 'n bitje te spoeëke door de Krang. Dao kwoom ich Harry Coolen tege. Dae begos mét mich te kalle, want ge wétj, dae mins is veur de duvel noch neet bang.

Hae vroeg mich of ich zin haaj om met te gaon nao café De Krang om 'n pötje beer te drinke. Van 't ein kwoom 't anger en ging ich de dage d'r nao same mét Harry everal in 't dörp oppe zoêp. Mer op Vastelaovundjs deensdig kwoom aan al det sjoeëns 'n indj...

Wat gebeurde d'r toen?

In zaal Derckx waas 't 'n prachtig fieëst. De prins veurop, de kapél speuldje, de wichter haai-je lôl.... Mer wie de daåg op zien indj leep, haai-je die Spoeëkejaegers genog gespoeëktj deenk ich. Ze pakedje 'n touw, boonje det om miene boëk en zatte mich oppe ker. De tractor reej wég en ederein kwoom achter mich aan. De prins, de kapél, de wichter en alle anger minse oet 't dörp. Ze zatte mich aaf beej de Krang en ich rendje trök 't bos in. Mer eder jaor kom ich trök om same met alle Spoeëkejaegers en Spoeëkejaegerinneskes d'r weer 'n sjoeën fieëst van te make!

Wie kan 't det wae dich de rest van 't jaor neet zien?

Oh, mer ich bin der waal, allein hebbe de minse ut neet in de gate! Ich zweef get tösse de buim as unne dichte neevel as de minse aan ut wandjele zeen. As ich gekke zin heb dan maak ich ze gaer aan 't sjrikke!

Welke streek haals ze dan allemaal oet?

Ich laot gaer de hoondj sjrikke! Dan gaet dae as 'nne haas d'r tösse-oet en de eigenaar der mer achteraan renne! Dan lach ich mich kapot! Of as 'n jóngk stêl op 't benkske geit zitte inne Krang, dan wil ich der nog waal ins tösse kroêpe en as ze dan wille kusse dan blaos ich un vettig äömke oet en dan is de zin geliêk euver!

Veuls ze dich nog altiêd net zoeë jónk as 55 jaor geleje?

Jaozeker, want de tieëd kriegtj gein vat op mich. Ich heb gein last van mien kneuk, want die heb ich neet! En ich kan drinke waat ich wil, want un laever heb ich ouch neet en ich heb noeëts last van koppien, want ouch hersens heb ich neet!

Mèr toch bisse de minse altiêd te snel aaf, wie kan det dan?

Omdet der ouch zat minse zeen sónger hersens, det is neet zoeë meujlik. Ich zal gein name neume, mér ich kom ze regelmaotig tege. Allein in de vastelaovundjstiêd zeen ze allemaal geliêk. Dan liektj 't waal of ze allemaal 'n pan aaf hebbe!


As ze III jaor aod moogs waere waat zoeëts ze dich dan winse?

Det wae mét alle Spoeëkejaegers samen, groeët en klein, aod en jóngk en alle minse die al euverleeje zeen samen door de Krang trékke in eine groeëte polonaise!



Teikene en kleure

Spoeëke zeen soms lastig te spotte. Ze kieks d'r soms zoëë doorheer. Zuus dich ut spoeëk op deze pagina?



Liene trekke

Maak dit spoeëk aaf. Trek liene van nummer 1 tot 35. Als ut aaf is kinse ut auch nog inkleure.



Inkleure

Gaef os logo weer kleur!

- 1: groen
- 2: lichtbruin
- 3: donkergrijs
- 4: donkerbruin
- 5: crème / beige
- 6: lichtgrijs

Buurte over buutte



Wat is de euvereinkomst tösse sjoëenmoöder en de buurtpaoshaas? Henrie van Geneijgen heet ze allebeij gedaon!

Mèt klam hendjes

't Is vriëdig 10 jannewarie in theater De Oranjerie in Remunj. De spanning hangtj inne lócht, want 't memênt is dao: de onthulling vanne buuttekampioen van 2025. Vól spanning steit Henrie, as Tony den Naturist, mèt klam hendjes te wachte op wat koome geit.

Aafvaege aan zien bóks is gein optie

Ziën hert bóntjtj in ziën liëf terwiël hae zenuwechtig de groeëte houte ton vasthultj die beej zien kostuum huuërtj. Mer zien henj, naat van 't zweît, hebbe meujte om de ton omhoeëg te haoje. Aafvaege aan zien bóks is helaas gein optie. "Sjeet op," deentjtj Henrie óngedöldjig, terwiël de ton langzaam wèg glietj. "Angers kriëge ze straks 'n ónthulling woeë nemes op zitj te wächte..."

Woeë 't begos

Mer laote wae effe trök gaon nao 't begin. In 2003 begos Henrie zien carrière as buuttereedner op de boëntje aovundj in Swartbrook as opvólger van Broer van den Berk. In iërste instântie trooj hae allein in 't dörp op, mer det verângerdje in 2008 wie Henrie veur 't iëerst mèt deej aan de veurrondes van de Limburgste Buuttekampioensjappe in Linne. Mèt det optraeje verzekerdje Henrie zich van 'n plaats inne finale in 2009, gehaoje inne Oranjerie. Heej bracht hae ziene buut "De Gemeindjewêrker", 'n optraeje woeëm mèt hae groeëte indrök maakdje. Zien iërste podiumplaats haaldje hae in 2011 mèt ziene buut "De Buurtpaoshaas", woeë mèt hae twieëdje woord.

Zien unieke stiël

Wat Henrie onderscheidj van angere buuttereedners, is zien unieke stiël: druuëge humor, weinig traditionele moppe en eige grappe. Hij gebroektj dèk 't dageliks laeve as inspiratie en bouwtj zien buute op roôndjom herkenbare typetjes. 't Is zien overtuûging desse 't typetje neet allein mos speûle, mer 't echt mos zeën.

Un good verhaal, 'n sjoëen opkomst en passendje klei-er zeen net zoeë belangriëk.

Zien groeëte veurbieëldj


Henrie zien groeëte veurbieëldj is Pierre Cnoops, zien timing en unieke humor hebbe 'm altiëd geïnspireerdj. Volges Henrie is unne gooje buut mieër dan allein 'n paar grappe vertèlle. Un good verhaal, 'n sjoëen opkomst en passendje klei-er zeen net zoeë belangriëk. Ouch 't gebroëke van un neutraal dialect, zoeë det eederein ut kan begriëpe, is un must om unne gooje buut te sjriëve.

Un steun en toeverlaot

Naeve ut bekans eeder jaor buute op oppe boëntje aovundj van Swartbrook, blijftj hae ouch nouw betrokke door stökskes te sjriëve en anger te begeleide. Hae is un steun en toeverlaot veur eederein dae hulp nuûdig heet..

Un podiumplaats te pakke

Wae zeen weer trök inne Oranjerie. Vól spanning wachtj Henrie op de oetslaag. Ouch dit jaor heet hae weer un podiumplaats wete te pakke. Hae mocht unne sjoëne brónze medalie mèt nao hoês neme. Mer Henrie, veur os dörpke Swartbrook, bès dich GOUD!





Sponsore

Dees sponsoore haoje same mit V.V. de Spoeëkejaegers
de vastelaovundj in Swartbrook gaondje!



Administratiekantoor Breukers	Henko Workwear Group	Princen Sali BV
Administratiekantoor W.J.M. Koonen	Hoefsmederij van Hoef	Raelek
All-In Carwash	Hoeve Lieshout	Rene Dwars Makelaardij bv
Baanhuis	Jacks pub	Restaurant De Tos
Bakker Racing Products.NL	JoBeauty	Roger Houben Tuinen
Bakkerij Broekmans	Karnaval Wiertz	Scheurdeurke stalling
Bakkerij Kessels	Kinderfysiotherapie Fysio4Kids	Maatschap Pluimveebedrijf van den Schoor-Saes
Beerens Personenvervoer	Knommeliëërke	SCL Solutions B.V.
Bloemenshop Bovend'eerdt	Kuepers Constructie V.O.F.	Sjado
Bram Smeets Vakschilder	Kupers Touringcars	Slagerij Ruud en Marleen Heijkers
Bullseye publishing	LAULabel	Snijders Installatiebedrijf b.v.
D. Hoogeveen Handelsonderneming	Level 2	Spar Derksen
Dansrijck Nederweert	Maatschap Kemper- Vullingsh	Tims Truyen Installatie Montage en Service
De Beemd	Mixx People	Transform Energy
De Kweeckerij	Molen de Hoop	Van de Boom transport
Veugen Technology	Neijdens geluid en licht	Vd Kruijs Grondverzet B.V.
Fred Janssen Grondwerken	Neptunus structures	Wiën Weert
Fun Thrills	N-XT Accountants	ZeoN PowerTec
Fysiotherapie Philipsen en Meijer	Otech bouwadvies	
Glanum Medical BV	PARTY-time Weert	
	Pluimveebedrijf Antoine & Jolanda van de Kruijs	



Woord van de redactie



Leef Spoeëkejaegers en Spoeëkejaegerinnes,

't Waas 'n ieër om dees Spoeëkegezét veur uch to moge make. Dees boöntje verzameling aan verhale, grappe en anekdotes is 't resultaat van 'n droumteam det mét passie, humor en 'n flinke sjeut vastelaovendjsleefdje same heet gewêrktj. Tiêd om ze ff in de spotlights te zétte!



Lars Beerens, ozze ónvermeujbare veurzitter, heet óndanks det ziene rechtervoet ein maot kleiner is as ziene leenkervoot, zien beste beínke veur gezatte om sjoëen tekste te sjriëve veur de Spoeëkegezét. Mét ziene humor heet hae gezörgdj veur 'n houp sjaele zeíver dae gae heej trök kintj laeze.

Marc Heijmans, Vorst vanne Spoeëkejaegers en hinnefluusteraar. Marc deut niks as 'n hin sónger kop. 't Samestèlle van dees gezet waas veur hem dan auch 'n ei-jke. Hae is de mân dae zêlfs 'n hin kan laote krejje van plezeer. En zoeë as Marc 't zelf zeet; 't sjrievè van dees gezet is as 't traetje van hinne. Neet alle kieëre zeen 'n succes, mer völ kieëre verzekere succes.



Joeri Gielen, muzikale doeëzendjpoëët met greun vîngers, is 'nne ware maestro in tekst en tuin. Hae bracht harmonie in edere regel en wist met zien humoristische note, ederein in de vastelaovendjsstimming te kriêge. Zelfs de bleumkes inne hoof beginne spontaan te sjoenkele as Joeri in de buurt is!



Gonnie Ogier-Stals, meisters vanne verbieëldjing, bracht neet allein heur sjriefkeunste met, mer auch 'n bitje (film)magie. Heur verhale sprânkele as confetti inne lôcht, en mét heur leefjde veur tenieël maaktj ze van eder filmke 'n klein avontuur.



En netuurlijk 'n daverendj applaus veur **Eefke Vaes**, os creatieve superheldjin achter de sjêrme. Mét aug veur detail en flair veur design, heet zeuj dees gezet omgetoverdj tot 'n visueel spektakel. Zónger heur gouwe hendjes zoj dees Spoeëkegezét d'r neet zoeë sjoëen oetzeen!



'N speciaal woord van dânk aan **Marga van Bommel**. Mét 'n roeëj pen heet zeuj alle spelfoute oet dees gezet gehaaldj veur ze beej uch oppe mat veel!



Same hebbe wae mét völ plezeer en leefjde aan dees Spoeëkegezét gewêrktj. Wae hope det gae met 't laeze net zoeëvöl lôl hebtj as wae mét 't make. Laote wae d'r same 'nne sjoëne Vastelaovendj van make!





V.V. De Spoeëkejaegers wînsj uch unne sjoeëne Vastelaovundj!



www.spoeekejaegers.nl



info@spoeekejaegers.nl



Eutropiastraat 18, 6005 PE Weert

